


Henter e proyecto lo costa 624 Mil Florin

GOBIERNO TA BAY HACI CAMBIO DEN TRAFICO RIBA SMITH BOULEVARD



Riba e grafico aki por mira un sketch di e situacion di e caretera despues cu trabaonan necesario termina y Aruba ricibi un caretera cu cara nobo for di e cruzada banda di DOW te na Lagoen. E informacionnan di e sketch aki no ta 100% completo, como cu a haci uso di algun detayes cu Servicio Informativo di Gobierno a suministra na DIARIO. E mapa exacto por ta diferente.

ORANJESTAD(AAN) -- Entrante promer di Augustus Departamento di Obras Publicas lo cuminsa kita e instalacion di luznan di trafico banda di Alhambra Casino.

Motibo di esaki ta cu investigacionnan haci a demosta cu e caretera aki a bira un caretera secundario, esta cu awor e plan Sasaki ta casi completamente cla, no tin mucho trafico den vecindario di Alhambra.

Y pa e trafico cu ta pasa ey banda e luznan di trafico no ta un gran necesidad.

E luznan a ser poni banda di Alhambra na principio di ehecucion di e plan Sasaki pa regula e trafico, pero actualmente e gran mayoria di trafico ta haci uso di

e caretera di Sasaki.

Gobierno lo bay pone e luznan di trafico di Alhambra na otro puntonan strategico unda actualmente e trafico ta bastante pisa, esta ariba L.G. Smith Boulevard entre oficina di DOW y Wilhelmina Park.

Un comision a haci un estudio amplio pa Gobierno di e situacion di trafico ariba e caretera menciona y a recomenda Gobierno pa entre otro haci tres cambio drastico.

1. Traha un cruzada na Weststraat y pone luznan di trafico. Esaki ta significa cu Weststraat lo bira un caya di dos direccion y e caya lo pasa ariba di Lovers Ice Cream bay direc-

cion di Ritz.

2. Adapta e cruzada Oranjestraat - L.G. Smith Boulevard poniendo luznan di trafico. Esaki ta significa entre otro cu un parti di Oranjestraat, e caya pabao di Willem III Toren lo bira un caya di dos direccion.

Por ehempel biniendo for di Lagoenweg na altura di Fort Zoutman, trafico por bay na man robey.

3. Lo ta prohibi pa trafico ariba tur "zijweg" cu ta bin ariba L.G. Smith Boulevard bira na man robey. Por ehemplo na Lagoenweg actualmente pabao di e brug, e trafico cu kier bay pariba (bira na man robey) ta tarda masha hopi mes pa haya un

"chance" pa drenta L.G. Smith Boulevard.

Mescos den vecindario di mercado di fruta. Ta practicamente imposible bira na man robey pa bay direccion hotelnan.

Un otro cambio ta cu Shellstraat e caya pabao di Wendy's ta permiti trafico bay Zuid y no bay Noord mas.

Shellstraat lo keda caya di un solo direccion, pero solamente pa bay Zuid, drenta L.G. Smith Boulevard y lora solamente na man drechi.

Henter e proyecto di L.G. Smith Boulevard aki lo costa alrededor di 624 Mil Florin y ta encera pone luznan di trafico, traha sitio pa cruza pa peatonnan y

recap henter e caretera for di DOW te cu Wilhelmina Park.

Pa haci e trabaonan aki, lo bay cera e pida caretera aki ariba 29 di Juli proximo. Esaki ta sig-

nifica cu trafico bayendo pa hotel y San Nicolas cu actualmente ta haci uso di e caretera aki lo ser desvia pa usa otro careteranan como alternativa.

Tur e cambionan lo ser anuncia den medionan di comunicacion. Ta ser spera cu promer cu fin di aña henter e proyecto lo keda cla. Pa kita e luznan di trafico banda di Alhambra cooperacion y atencion ta ser pidi di automobilistanan pa evita accidentenan lamentable.